

Mae **Darllen Mewn Parau** yn ffordd dda y gall rhieni helpu eu plant i ddarllen. Mae'n gweithio'n dda gyda'r rhan fwyaf o blant a bydd yn eu helpu i fwynhau darllen.

## BETH FYDDWCH EI ANGEN

**LLYFRAU** i ddewis ohonynt. Mae'n bosibl benthyc llyfrau o lyfrgell yr ysgol ac mae'n werth ymuno gyda'ch llyfrgell leol gan fod ganddynt ddewis eang o lyfrau ar gyfer plant.

Dylai **eich plentyn** ddewis y llyfr. Os yw eich plentyn yn cael digon o ddarllen llyfr ac am ei newid nid oes problem gyda hynny. Mae plant yn dysgu darllen yn well wrth ddefnyddio llyfrau y maent yn eu hoffi.

**AMSER** i weithredu Darllen Mewn Parau. Ceisiwch wneud peth darllen ar y cyd bob dydd. Gallwch wneud 5 munud yn unig bob dydd os dymunwch. Peidiwch wneud mwy na 15 munud heblaw bod eich plentyn yn dymuno parhau. Mae'n holl bwysig fod gan rywun yn y teulu'r amser i wneud darllen ar y cyd am o leiaf 5 munud y dydd.

**LLEOLIAD** i wneud Darllen Mewn Parau. Ceisiwch ganfod le tawel. Mae'n anodd i blant ddarllen pan mae llawer o sŵn neu fod llawer o bethau yn mynd ymlaen yn y cefndir. Ewch i ffwrdd oddi wrth y teledu neu trowch ef i ffwrdd. Os nad ydych yn gyfforddus yna byddwch yn ei chael yn anodd canolbwyntio ac i edrych yn ofalus ar y llyfr gyda'ch gilydd.

## TECHNEG RHIF 1

### DARLLEN MEWN PARAU

#### Amcan 1.

Gwneud yn siŵr bod y plentyn â diddordeb ac yn gyfarwydd â chynnwys, iaith, cymeriadau a digwyddiadau'r llyfr.

#### Dull.

Ewch drwy'r llyfr gan ofyn cwestiynau a gwneud sylwadau am y lluniau (gan ddechrau gyda'r clawr fel arfer).

"Mae'n rhaid mai Jack yw e - be mae e'n ei wneud?"

"Beth sy'n digwydd yma?"

"Pam rwy't ti'n meddwl ei fod yn gwneud hynny?"

Tynnwch sylw at yr enwau ond peidiwch â gofyn cwestiynau am y testun na chwestiynau sy'n golygu fod yn rhaid mynd ati i ddarllen. Derbyniwch bob ateb rhesymol, (Dim mwy na dwy i dair munud).

**Noder:** Bydd arnoch angen edrych ar/ darllen llyfr newydd yn gyntaf

#### Amcan 2.

Gwneud yn siŵr bod y plentyn wedi clywed y llyfr sydd yn cael ei ddarllen. Cynorthwyo plentyn i wrando yn ofalus. Dilyn testun y mae eich bys yn pwyntio ato wrth i chi ddarllen.

## Dull.

Gan fod eich plentyn yn eistedd wrth eich ochr, dywedwch bethau fel:

"Rwy'n mynd i ddarllen y llyfr hwn i ti. Gwranda yn ofalus a dilyn fy mys wrth i mi ddarllen."

"Beth am ddarllen y llyfr hwn gyda'n gilydd."

Darllenwch yn glir gan roi digon o fynegiant dramatig yn y darlleniad.

Symudwch eich bys o dan y testun wrth i chi ddarllen.

Cadarnhau - Ewch yn ôl i ddechrau'r llyfr, symudwch eich bys o dan linell o bob tudalen a gofynnwch gwestiwn syml ynglŷn â'r dudalen y byddwch yn sicr y bydd y plentyn yn gallu ei ateb yn gywir. e.e.

"Beth ddywedodd Jack?"

"Pwy wnaeth hyn a hyn?"

Rhowch ganmoliaeth i'r plentyn am atebion cywir, derbyniwch rai anghywir ond rhowch yr ateb cywir heb dynnu sylw at hynny. (Dim mwy na thair munud)

## DARLLEN MEWN PARAU

### AMCAN.

Bydd eich plentyn yn darllen yn unsain gyda chi, hynny yw, byddwch yn darllen gyda'ch gilydd ar yr un pryd.

### DULL.

Dywedwch wrth eich plentyn eich bod yn mynd i ddarllen y llyfr eto ond y tro hwn eich bod eisiau iddo ef/ hi ddarllen gyda chi yn uchel a gyda digon o fynegiant. Darllenwch ar gyflymdra cyffredin gyda digon o fynegiant, wrth symud eich bys o dan y testun.

**Gofalwch** - erbyn diwedd y funud gyntaf bod eich plentyn yn darllen gyda chi gan ddweud pob gair.

**Gofalwch** - erbyn diwedd tair munud bod eich plentyn yn darllen gyda chi gyda mynegiant mewn llais clir ac uchel. Yna dywedwch wrth eich plentyn y tro hwn eich bod eisiau iddo ddarllen rhai geiriau/ymadroddion/brawddegau ar ei ben ei hun. Byddwch yn dechrau darllen gyda'ch gilydd eto, a phan fydd o eisiau darllen yn annibynnol bydd yn rhoi cnoc i'r bwrdd neu yn cyffwrdd eich braich. Yna byddwch yn peidio â darllen ac yn gwrandao ar eich plentyn yn darllen hyd nes bydd yn gwneud camgymeriad neu pan fydd yn methu â darllen gair ar ôl trio am tua phedair eiliad. Pan fydd hyn yn digwydd rhowch y gair iddo (peidiwch â thynnu sylw at y camgymeriad) gofynnwch i'ch plentyn ailadrodd y gair cywir. Yna ail ddechreuwch ddarllen gyda'ch gilydd hyd nes bydd eich plentyn yn rhoi cnoc i'r bwrdd neu yn tynnu eich sylw eto.

Rhowch ganmoliaeth i'ch plentyn **bob amser** am gnocio ac am ddarllen yn annibynnol.

**Canmolwch** y plentyn am gywiro ei hun. Peidiwch â rhoi sylwadau ar gamgymeriadau'r plentyn.

Yn raddol dylai'r amser y bydd eich plentyn yn darllen yn annibynnol gynyddu.

## TECHNEG RHIF 2.

### DARLLEN WEDI EI BARATOI.

Mae hon yn dechneg ar gyfer darllenwyr hŷn neu fwy galluog nad ydynt angen darllen mewn parau (darllen unsain). Y bwriad yw sicrhau na ofynnir i'ch plentyn ddarllen unrhyw beth nad yw ef/ hi yn ei ddeall. Mantais darllen wedi ei baratoi yw bod hyn yn rhoi mwy o amser i'r plentyn ddarllen ar ei ben ei hun yn ystod eich sesiynau darllen yn y cartref.

### DULL.

Dechreuwch fel ag o'r blaen - hynny yw, ewch dros y stori hyd yn hyn, trafodwch gymeriadau ac ati yn y stori newydd.

Darllenwch y darn yn uchel ar gyflymder cyffredin gyda digon o fynegiant.

Yna ewch drwy'r darn gyda'ch plentyn gan dynnu sylw at eiriau ac

ymadroddion a allai beri anhawster o safbwynt eu darllen neu eu hystyr.

Dim ond ar ôl gwneud hyn y dylech ofyn i'ch plentyn ddarllen yn uchel ar ben ei hun. Gwrandewch yn ofalus. Darllenwch unrhyw eiriau neu ymadroddion y mae eich plentyn yn cael anhawster gyda hwy ar ôl saib byr (tua phedair eiliad).

Peidiwch â thynnu sylw at unrhyw gamgymeriadau.

Os bydd eich plentyn yn cael anhawster gyda'r dull hwn ewch yn ôl at dechneg y darllen mewn parau a/ neu cysylltwch â'r ysgol am fwy o gyngor.

## CANLLAWIAU YNGLŶN Â DARLLEN YN Y CARTREF.

### PETHAU I'W GWNEUD.

- Gwnewch yn siŵr fod y sesiwn yn un hapus. Rhowch eich holl sylw i'r gwaith.
- Canfyddwch le distaw i ffwrdd oddi wrth bethau fel y teledu, radio neu blant eraill yn chwarae.
- Gwnewch eich hunain yn gyfforddus, mae eistedd ochr wrth ochr yn well nag eistedd yn wynebu eich gilydd.
- Pan fyddwch wedi sefydlu'r trefniadau, glynwch wrthynt gan y bydd yr arferiad yn gymorth i'r gwaith.
- Rhowch lawer o ganmoliaeth am ymdrech (e.e. dweud "Da iawn ti", neu wenu neu guro cefn y plentyn).
- Dilynwch y dechneg a awgrymir.

## PEIDIWCH Â:

- gwneud darllen yn dasg annifyr a diflas.
- bygwth dweud wrth yr athro/ athrawes os nad ydynt yn gwneud y gwaith.
- gwneud i'r plentyn feddwl ei fod yn cystadlu ag unrhyw un arall.
- dangos pryder oherwydd ei ddiffyg diddordeb.
- beirniadu ymdrechion eich plentyn na thynnu sylw at gamgymeriadau.
- bod yn brin â'ch canmoliaeth.
- bod ofn gofyn am help neu gymorth o'r ysgol, pa mor ddibwys bynnag y credwch yw'r broblem.